



14. februar 2022

UPA 2022/70

Inatsisartut ingerlatsinermut maleruagassaasa § 33 tunngavigalugu Inatsisartunut ukuningga aaliangiiffigisassatut siunnersuuteqarpunga:

Inatsisartut aalajangiiffigisassaattut siunnersuut Inatsisartunut Siulittaasoqarfik partiit tapiissutaat pillugit inatsimmi allannguutissatut siunnersuummik saqqummiussinissaat¹ Namminersorlutik Oqartussani ukiumut sipaaruteqartarnissaq aammalu partiit akunnerminni aningaasatigut naligiinngissuseq annikillisarnissaa siunertaralugu. Partiinut tapiissuteqartarneq pillugu inatsimmi allannguutissatut siunnersuuteqarnermi suliniutit uku ilaatinneqassapput:

- 1. Partiinut tunngaviummik tapiissutit ukiumut 1 million kr.-mut qaffanneqassooq**
- 2. Qaffasinnerpaafissaanut killiliusaaq atuutsinneqalissaaq taamaasilluni annertunerpaamik qinigaatanut tapiissutigineqartartoq qinikkanut arfinilinnut killiliunneqarluni.**

Inatsi 1. januar 2024 atuutilersinneqassaaq

(Inatsisartunut ilaasortaq Jens-Frederik Nielsen, Demokraatit)

Tunngavilersuut:

Politikkikkut partiinut tapiissutigineqartartut demokratiskimik ingerlanitsinnut demokratiskiusumillu oqallinnitsinnut pingaaruteqarpoq. Kisiannili oqallisigineqarsinnaavoq pisortat aningaasaataat annertuallaat partiinut tapiissutigineqartartut atorneqarnermut, patiissutigineqartullu isumatusaartumik atorneqarnermut.

Partiinut tapiissuteqartarnermut inatsi 1996-mi saqqummeqqaarmat pisortaniit politikikkut sulinermit tapiissutigineqartartut (qineqqusaarnermi tapiissutit minillugit) 2,5 million kr.-nit partiinut tallimanut agguarsimapput. Ullumikkut 13,5 million kr.-nit aammattaaq partiinut tallimanut agguarsimapput. Ukiut 25-it ingerlanerini partiinut tapiissutigineqartartoq tallimariaammik allisimavoq. (Uani akit nalingisa ineriartorneri / pisiassallu akingisa ineriartornerat ilanngunneqarsimangilaq).

13,5 million kr.-nit taakku ukiut tamaasa partiinut tapiissutigineqartartut maani nunami innuttaasumut ataasiakkaamut 239 kr.-mik naleqarpoq. Stat-ip Qallunaat Nunaata partiivinut tunniuttagaanut sanilliutissagaanni innuttaasumut ataasiakkaamut 20 kr.-neqarpoq.

Demokraatit aqutseriaaseq tamanna akisuallaartutut isigaa partiinullu anginernut iluaquseerujussuutarluni. Tamanna partiit akunnerminni naligiinnginnermik pilersitsivoq, nammaqatigiinnissamut unammilleqatigiinnissamullu equngatitsilluni. Tamanna pillugu aqutseriaatsimut allannguinnissatsinnut siunnersuuteqarpugut.

¹ Inatsisartut inatsisaat politikikkut sulinermit aningaasatigut tapiissuteqartarneq pillugu



Tamanit naluneqanngilaq partiit "pisoqasaatut" taaneqartartut (Atassut, Siumut aamma Inuit Ataqatigiit) akiitsuminik nungusaallutik sorsuuteqarnikut. Tamanna partiit "nutaajusunut" (Naleraq aamma Demokraatit) nalaanneqarnikuunngilaq.

Ukiut kingulliit takusinnaasimavarpur Siumut, Inuit Ataqatigiit aamma Atassut akiitsuminnik akilersuingaatsiarsimasut. Tamanna partiit tapiissutaata qaffariarujussuarneranit iluaqusersorneqarpoq, 2018-mi atuutilersimasumit partiinillu ilalersorneqangaatsiarsimasoq uagut Demokraatit minilluta.

Demokraatit isumaqarput maannakkut partiinut tapiissutigineqartartut annertuallaartoq, pequtugalugu politikikkut sulinissaraluamiit taarsiullugit akiitsunut matussusiiniarnermut atorineqarmata. Partiit maanna akiitsui akilerneqareersullu tapiissutit apparnissaat pissusissamisuumarpoq – minnerunngitsumik partiit angisuut naligiinneruneq kivitseqatigiinnerlu qulakkeerumallugu. Inuit Ataqatigiit kissaataat maleqqissaarlugu.

Partiinut tapiisarnermut aqutseriaaseq ima ilusilersorneqarsimavoq partiit Inatsisartuniittut tunngaviumik tapiiffigineqartarlutik (898.000kr.) aammattaaq qinikkanut tapiissutit (291.000kr Inatsisartunut qinikkamut ataatsimut). Tamanna isumaqarpoq partiinut tapiissutigineqartartut tamakkiisooq 13.511.000 koruuniulluni.

Siunnersuut una aqutugalugu tunngaviumik tapiissut 1 million koruuninut qaffanneqarnissaa Demokraatiniit kissaatigaarput. Tamanna isumaqarpoq ullumikkormit 510.000 koruuninik atuineruneq.

Taasumap avataasigut qinikkanut tapiissutit tiguneqarsinnaasut qummut killilerneqarnissaa siunnersuutigaarput. Qummut killerititaq tamanna qinikkat arfinilinnut killiliunneqassasoq siunnersuutigaarput, ullumikkut atuinermit sanilliullugu 2.910.000 koruuninik sipaaruteqartussa.

Tamanna isumaqarpoq nunatta karsianut ataatsimut isigalugu 2.400.000 koruuninik sipaaruteqartoqassasoq.

Ammalluinnarpugut qinikkanut tapiissutit qummut killiliunneqarnissaa tallimanut inissinneqassagaluarpat, suli naligiinnerunissaq Inatsisartut kissaatigissagaluarpassuk, kivitseqatigiinneq annertunerusoq aningaasanillu sipaaruteqarneraluta.

Aaqqiissutit allat ammaffigaakka, naligiinnerulernissamut nunattalu karsianut sipaarutaasinnaasunut. Soorlu assersuutugalugu tunngaviumik tapiissutit suli qaffanneqarsinnaapput qinikkanut tapiissutit appangaatsiarlugit qummulli killilernagu. Taamaattorli siunnersuutigineqartoq pitsaanerpaatut tamanullu assigiinnerusumik aaqqiissutit isigaara.

Partiit sinnerisa ilanngussassa qilanaaraakka.



Pisortanut aningaasatigut allaffissornikkullu kingunissai

Qinikkat akornanni inissisimaneq aallaavigalugu Namminersorlutik Oqartussat ukiumut 2.400.000 koruuninik sipaaruteqartassapput.

Politikkikkut sulinermut aningaasatigut tapiissuteqartarneq pillugu Inatsisartut Inatsisaat allanngortinneqarnissaanut Inatsisartut Inatsisaanut siunnersuuteqarnermut allaffissornikkut nukinnik atuinissaq ilimagineqarpoq, ukiumut suliap affaata qaangernissaanik ilimagineqanngitsumik.

Namminersorlutik inuussutissarsiuteqartunut aningaasatigut allaffissornikkullu kingunissai

Soqanngilaq

Innuttaasunut aningaasatigut allaffissornikkullu kingunissai

Soqanngilaq